

四庫全書

集部

欽定四庫全書

江湖小集卷二十九

宋 陳起 編

吳仲字菊潭詩集

春閨怨

細柳輕烟鎖畫樓  
樓中人去水長流  
琵琶聲斷梅花客  
別是春風一種愁

蘇堤清明即事

梨花風起正清明  
遊子尋春半出城  
日暮笙歌收拾去

萬株楊柳屬流鶯

湖上雨吟

濕了荷花雨便休  
晚風歸柳澹於秋  
一生不作機心事  
合轉船頭向白鷗

雨後

雨後輕雲學水流  
惜春人瘦怕春休  
梨花却恐難尋夢  
燕子何曾細說愁

賀史守鳳雛滿月

玉手歌姬托鳳雛  
堂前畫額旋調朱  
春風吳會宜男草  
試問他人種得無

寄東畎曹侍郎

結網求魚事已遲  
却非春草不歸詩  
斜陽一片山如畫  
更把心期付與誰

題秋江晚照圖

水光只肯淨涵虛  
分浦通村路却無  
風日向低鴻鴈落  
釣竿一半出菰蒲

名媛詩歸  
卷二十九  
曉吟

翠帳香消捲碧紗  
風梢殘雨濕欄牙  
蜻蜒亦被涼勾引  
清曉低飛入水花

春詠

草堂燕子未歸時  
香鼎灰飛入硯池  
看徹唐人詩一卷  
夕陽猶在杏花枝

贈別上官良史

不惜黃花一醉君  
喚歌催舞語紛紛  
天涯明月空相憶

寒鴈無聲入斷雲

秋夕

西風吹露下秋空  
烏鵲無聲占碧桐  
天氣微涼人好睡  
闌干閑在月明中

望望

閑與蘆花立水邊  
歸心客思兩茫然  
夕陽收盡天風急  
一樹寒鴉落野田

辭史侍郎

金史四  
卷二十九  
事到依人易策勲合歸叔拾北山雲春風入手非閑用  
種得梅花却寄君

春夢謠

銷金帳掩水沉煙髻滑金釵落枕邊魂夢不知春已去  
誤隨蝴蝶過秋千

拜和靖墓

墳草年年一度青梅花無主自飄零定知魂在梅花上  
唯有春風喚得醒

重拜和靖墓

片玉沉山草亦珍  
斷碑殘石當麒麟  
君王別爲開門戶  
不欲梅花見路人

閨怨

病起傷春獨倚門  
喚人鸚鵡隔簾聞  
無情最是東風惡  
瘦却梨花一片雲

仙興

宮殿高高在五雲  
鶴搖松露滴行人  
洞門不放東風過

留得桃花一院春

山居春興

林雪消寒滴春風入草廬好山分客看閑地課童鉏竹  
瘦偏宜鶴泉清直見魚邇來因苦詠零亂一床書

寄大使趙清臣

擒吳綬了合封侯何止區區古蔡州一着高時全國體  
十年危處與心謀山川恢拓春風遠天地清明王氣浮  
白雪滿頭勲業大不應忘却赤松遊

寄蔣重珍祕書

焚香誦易與天游君命相催不肯休時節固知來則是  
功名却以得爲憂翠蓬雲氣生衣袂金殿陽光動冕旒  
此際一言能悟主始堪回首舊林丘

寄越上高疎寮

便教烟雨畫成圖爭似歸來有賀湖鏡裏精神西晉有  
詩家標準晚唐無惜花春盡鶯吟苦敲竹風清鶴夢孤  
世事正多心早懶著書贏得靜工夫

立春日即事

檢殘玉曆又春來造化無私命轉乖  
照水莫嫌窮面目看花長有好情懷  
生期惠遠眠雲過死問林逋借地埋  
詩到夜寒吟更苦一枝梅雪映書齋

送伯氏秋潭謀居

朝吳暮楚幾時休未必江湖有白鷗  
萬事莫如歸去好一椽當爲老來謀  
春天吟思行花徑夜月琴聲坐竹樓  
但得餘齡無俯仰曾公食粥亦風流

送王夢升入道

不肯輕迷固有天星冠霞整竟翩然人能變體方超俗  
丹到成功即是仙伏洞黑龍聽夜呪傍花白鹿伴春眠  
哦詩更欲全清致當以彌明作正傳

贈史泳

烽火窮邊幾度愁亦曾將死博封侯謗興在彼情誰恕  
事過知君痛自休跨馬甲衣春雪白射鵬弓箭曉星流  
救時正屬英雄者更著工夫必到頭

移居即事

山移無復昔人賢，隨分長安辦一椽。  
掃室敢言天下志，閉門儘可雪中眠。  
携瓶與客同沽酒，接綆過鄰自汲泉。  
到此始知閑是福，居山未必似居廛。

呈雲麓史侍郎

若教儘儘說漂沉，却恐無憊老不禁。  
百拙難隨今日巧，一貧方識古人心。  
牛羊歸盡荒郊濶，猿鶴愁多故國深。  
亦欲以詩爲活計，世間何許覓知音。

謀生

謀生一事到成功消得湖邊地幾弓  
韋曲有花留杜老洛陽無客問盧仝  
春風燕子虛簷外夜雨蛩聲小徑中  
所立規模雖冷淡絕勝彈鋏舊漂蓬

贈越僧意書記

一衲冰霜二十年不知妙用自誰傳  
心能轉物方爲佛詩到名家亦是仙  
喜客稍寬沽酒禁愛閑多結住山緣  
今冬約我西湖上同看梅花坐釣船

自序

一劍辭家竟陸沉，夢思空向故廬深。  
槎迷河漢千年恨，樹隔關山萬里心。  
衣垢正憐貧未去，鏡明忽有老相尋。  
春歸不與人爲約，青草催詩亦懶吟。

秋夕

雨聲雲氣暮蕭蕭，羅扇恩疎井樹凋。  
心事暗隨歸夢去，壁燈留與可憐宵。

詠貓

弄花撲蝶悔當年喫到殘糜味却鮮不肯春風留業種  
破氈尋夢佛燈前

次王漢和見寄韻

扇恩已盡漢宮秋空憶金鞍遠玉樓九辯不歌黃菊老  
斷烟零雨爲誰愁

江湖小集卷二十九

欽定四庫全書

江湖小集卷三十

宋 陳起 編

劉翼心游摘稿

躔父與余同事樂軒先生躔父鄙夷場屋之事技獨力於詩自晉唐而下至我朝諸公遺集掇擷數百家所作不主一體大抵學樂軒為之先生有道之士也其詩初為唐語後為晉語晚而傲世自樂盡去繩墨法度自為樂軒一家之言蓋耻入今人古人窠臼也

如娑羅林中最後說法六師諸魔聞者益懼矣同門諸友獨躔父入此三昧心游之橐甚富今乃摘取余所可知者十九首見寄余讀而喜曰此吾師初時詩法也是豈不足行世耶然君世事樂軒乃翁俗下筆尤勁高處不下止齋岷隱而不以進取為意方躔父少年聞人說舉子業即掉頭揮手而去獨與翁守樂軒之書呻吟竟日今年六十有四好慕如十八九時充此心至道不難也是豈求以詩名家者哉余長躔

父五歲於道無聞詩亦不進非特媿於吾師亦媿於  
吾友矣躔父名翼橫塘劉氏景定辛酉竹溪廬齋林  
希逸序

題心游樓

一自浮光抵玉融東林山曲世為農前場歲計禾麻麥  
後圃年深竹荔松博我多聞千載史喚人深省五更鐘  
不消更會楞嚴語面面披雲挹曉峯

心游樓即事

禪坐寧離此意行何所如稻梁詩七月果木賦間居活  
水嘗新茗顛風落舊書無才甘用拙不是隱樵漁

癸卯十月同林子宜拜掃先師樂軒墓因和南

谷寺壁間韻

秋風颯颯已華顛男女猶賒嫁娶錢問道西軒空有夢  
繡經南谷恐無緣登墳薦酒徒為爾對佛拈花亦偶然  
回首白雲無叫處青山長在淚痕邊

答林昌宗詩荃韻

經鋤小暇弄詩筌老去仍知默是禪  
滄海移舟盡琴趣雖然終不似無絃

題東臯詩卷

雪竹霜松不老身儘教後進笑陳人  
相逢亦有吟詩客誰似先生語意真

書情

蕭疎遠市囂山窟雜耕樵窮鬼乘吾拙  
錢神挾汝驕世途自巖嶮真性本逍遙  
尚想榮期樂綸巾傲漢貂

夜意

平生萬事水東流，獨有多情是風癢。  
夜長無寐月窺牀，擁被孤吟起還想。

伯言見和拙作以漢隸書之謝以七韻

李潮善八分，求歌杜陵叟。有人和我詩，半紙餘科斗。  
風雲生其懷，劔戟出其手。石經中郎蔡，新樣元和柳。  
元常丈不傳，退之書何有待。我農隙時載筆隨，君後袖手眼亦明。  
聊與之飲酒。

偶見官舍梅花作

天然標格自瀟疎底用松篁水月俱但是梅花皆可愛  
何關東閣與西湖

挽教儀仲

半面春風已有情別來重見眼終青空齋夜雨十年後  
一醉黃花叫不醒

對坐茶甌日兩迴曾懷真率向人開茶甌對客如前度  
不見先生杖屨來

畫倚籃輿餞一杯殷勤別語到簾幃那知此夜成長往  
書屋無人月掩扉

書中有種復何愁酒興詩狂卒未休莫唱橫塘斷腸句

不堪斜日獨登樓

儀仲有題心游樓詞

送二子從子宜讀書

三代讀書無寸功又將此法教兒童旁人笑我背時好  
不背旁人背樂翁

山寺聽雨

問道論詩也一宗燒柴煨芋佛家風要知真樂人間少  
聽雨空山破寺中

戲和劉雪巢題壁韻

劉有不知何處  
有唐詩之句

吟懷祇怕俗塵迷若慕唐人也自癡要識性情根極處  
請觀三百五篇詩

題平遠軒呈竹溪玉堂

溪堂關小軒此景絕可愛蔡松道東邊千載典刑在高  
低萬頃田面勢溪向背生綃一幅寬晴雨不盡態中有

謫仙人來尋莘野耒畝雖不忘知進不如退乾坤入  
醉眼風月出吟喙我非人境遊亭在人境內心平水不  
波見遠山無礙時携琰石遊間以劉白輩僕忝老諸生  
來和佛三昧

題簡上人西亭詩文後

真如非字義綺語道之疵未見西亭作長爲北碕欺晚  
因僧媚遠初實客從曦多少才名士沉淪世不知

夢呈樂軒先生既覺不失一字錄呈竹溪

玉堂

不見仙翁四十春，幸然丘隴在比鄰。當年四海從游者，

報佛深恩有幾人。

艾軒先生工部侍郎文節林公一傳  
為綱山林先生諱亦之字學可再傳

為樂軒陳先生諱藻字元潔皆有集行世竹溪樂軒之  
嫡子也

江湖小集卷三十

欽定四庫全書

江湖小集卷三十一

宋 陳起 編

朱繼芳靜佳龍尋稿

和顏長官百詠 并引

龍尋邑東有顏長官仁郁祠長官五代時能撫循其  
民使不見兵革龍尋志所刻詩百篇皆道民疾苦皇  
皇不給之狀余生三百年後奉天子命字茲邑晉  
謁祠下因次韻以寄甘棠之思且使來者知我愛桐

鄉之意云

農桑

裹飯甌兒候暖耕  
膝泥滑滑不堪行  
如何說得農家苦  
雨笠風蓑過一生

婦盃夫耕日尚長  
碓聲嗚咽宿舂糧  
尋思一飯何時飽  
秧種青青麥未黃

淡黃竹紙說蠲逋  
白紙仍科不稼租  
努力經營猶恨晚  
官司那問有錢無

編茅爲屋荻爲簾老小團欒苦樂兼樂歲輸丁猶未了  
饑年家口更堪添

頭白村翁尚把鋤瓶中那復斗升儲午飡減與饑鳥食  
却愧家人問有餘

四月官場入納時鄉耆旁午上門追請看貧婦通宵織  
身上曾無掛一絲

腸隨絲斷手生胝羨殺星邊織女機借問輸官零落否  
兒郎寒冷且無衣

金史四庫全書  
卷三十一  
農父眉頭百念攢雨愁爛死旱愁乾龍神社鬼燒香遍  
不到秋成睡不安

客戶耕田主戶收螟蝗水旱百般憂及秋幸有黃雲割  
債主相煎得自由

帶得鷄豚起曉虛荒村牢落數家居一家幸是田園主  
留與兒孫寫契書

朱門

紅雨聲乾未作泥繡成十里綠楊堤金杯緩勸玲瓏唱

玉勒催歸腰裏嘶

晉代豪華不數家  
萬錢下筋未爲奢  
客來只是家常飯  
豆粥萍齏費咄嗟

曲池畢竟有平時  
冷眼看他炙手兒  
十數年間三易主  
焉知來者復爲誰

客履三千此托身  
晚杯孤白暖生春  
狂來且置興亡事  
金塢銅陵不解貧

天近偏承雨露榮  
深深庭院鎖清明  
柳絲風送鞦韆影

金瓶梅詞話卷三十一  
牆外行人空復情

朱門往事若爲懷  
積雨苔痕綠上階  
幾處敗甌吟蟋蟀  
玉人曾此溜金釵

百斛明珠米在倉  
沉香火底捻銀簧  
人生行樂須如許  
多少邊兵未有糧

沉金摺損舞衣羅  
蹙破遙山皓齒歌  
此曲人間聽不得  
莫愁還自有愁多

中壽知無滿百身  
暖歌冷舞及青春  
黃金不買長生藥

白髮偏驚快活人

長楸走馬却歸來  
雉挾春驕未應媒  
不信杏梁雙燕語  
日長簾幙有風開

客路

一曲長歌行路難  
昏鴉歸盡倚闌干  
不知楚水巴山地  
更有高樓鳥外看

哀猿啼斷暮雲深  
摸索牀頭未盡金  
莫道他鄉千萬里  
去家三日幾般心

兒女傷悲士不爲健行童僕遠相依春風日日生芳草  
未必啼鵲怨不歸

俠客千金不稱求途窮相顧問因由臨分脫贈青萍劍  
莫蕩人間瑣碎讎

客裏情懷更晚秋鴈烟蛩雨五更頭從前諳盡江湖味  
不省神州作麼愁

身如海燕傍誰門別淚雙垂不見親惟有一條印竹杖  
相隨萬里共艱辛

是處人家搗練忙天寒日短路偏長  
蛩聲四壁無時歇  
不遣羈人夢到鄉

送窮不去柰窮何山有荆榛水有波  
萬物得時人自老  
梁鴻頭白五噫歌

屈指秋風與鴈期陽關西去到何時  
側身一望腸堪斷  
天似穹廬碧四垂

高鳥翩翩去未窮行人擾擾復西東  
何須華表千年鶴  
城郭重來便不同

邊庭

年年塞草欲秋時左右紅旗說戰機  
介冑麈官應有語而今宰相好吟詩

角聲吹裂肺肝愁說與將軍莫逗留  
男子生當侯萬里死判馬草海西頭

一劍沙場獨苦辛天陰殺氣作黃塵  
沉思烏盡弓無用肘後累累却顧身

探使歸來半信疑帳前相語怕人知  
沉香霧裏嬌絃暖

莫遣邊愁到兩眉

征夫戰骨洒桑乾帳下蒼頭自轉官一騎紅塵天外落  
籌功更說幾多般

公主琵琶胡地秋將軍刁斗漢關愁相逢老病無依卒  
未說沙場淚已流

蒼苔白骨滿黃沙馬汗成冰帶雪花夜夜鞘中長缺吼  
教人不得夢還家

有客新從塞上回解包收得戰場灰營家未敢分明哭

請看刀痕始欲哀

兵罷邊方得暫寧  
棗兒紅近莫忘兵  
漢家誰倡和親議  
此錯烏金鑄不成

北風吹骨最酸辛  
白面書生四角巾  
戰士總成亡命鬼  
將軍纔是有功人

城市

村翁生長在柴門  
身有丁男犢有孫  
爲了官租纔出市  
歸家夸說與鄉村

雀羅門巷昔趨榮  
味似飴甜忽變辛  
說與侯門休謝客  
朝朝暮暮看人情

王孫公子少年遊  
醉裏擣蒲信采投  
指點某莊還博直  
明朝酒醒到家求

山人只合住山中  
入得城來調不同  
滿面紅塵無處避  
手携白羽障西風

紫陌尋春日日過  
楊花無主奈春何  
傾城壓酒嬌無力  
醉裏相扶踏踏歌

相班士女狹邪間總把喧啾賣却閑人壽幾何春不再  
典衣沽酒強追攀

春風日日柳年年到老那知稼穡難若見田家秋作苦  
教人一飯不遑安

蕪城懷古最愁人劫火燒殘得此身舞榭歌臺何足道  
秦宮漢苑尚流塵

百人聚處小喧闐析到秋毫似計然見說天公還掠剩  
鵠形懷寶度饑年

身遊城市髮將華  
眼見人情似槿花  
惟有梁間雙燕子  
不嫌貧巷主人家

貧女

春風有分到兒家也  
插花枝表歲華  
但得作嬪君子室  
隨宜粧遣不須奢

洗盡鉛華淨潔貧  
嫁衣莫說爲他人  
絕憐父母窮相守  
不爲金多賤却身

枯木無枝可作花  
門前度盡七香車  
四隣日日笙歌裏

背立東風有幾家

他家百兩送于歸成匹鴛鴦作錦機  
獨守空閨愁不寐  
一燈明滅補寒衣

燈下穿針影伴身懶將心事訴諸親  
阿婆許嫁無消息  
芍藥花開又一春

卓家人富頗輕財犢鼻堪依不用媒  
只似儂家貧亦好  
枯桐那得鳳凰來

少年蕩子有黃金投贈明璫結兩心  
不得良媒終不肯

一春風雨洞房深

伯鸞不作悵誰從  
鳳尾香衾翠幔重  
靜對菱花勻淚粉  
不知膏沐若爲容

問天乞巧看銅儀  
再拜雙星恨不隨  
塵世未知天上事  
隔河相望一年期

纖手清閑理瑟工  
高樓半在碧雲中  
行人豈是知音者  
小立花陰待曲終

負薪

三千門館躡珠寶半百還家衣錦身却是吏民私告語  
十年前是賣薪人

薪樗塞破野人居此是餽糧卒歲儲客裏黃金燃桂盡  
厨無煙火欲何如

爛柯人去隔存亡一局棋終愴故鄉想得山中絕煙火  
松花松子當乾糧

破帽籠頭髮半華樵歌一曲勝長嗟鷄鳴裹飯登高去  
日暮天寒未到家

有薪可賣未須悲，滿百青銅況有奇。  
十指束枯從禿盡，不堪棘刺胃人衣。

天寒氣入鼻中辛，竹擔彎彎却戀身。  
賣得錢來回首望，蠟煙起處屬何人。

腰鎌上到白雲邊，惆悵長松不盡年。  
近市山山皆有主，遠山高峭步難前。

蒸梨炊黍付荆妻，指點青山澗水西。  
忽聽丁丁雲外斧，一聲山鳥背人啼。

捫蘿緣壁到山頭俯羨鴻飛儘自由風雨蕭蕭黃葉滑  
未行十步兩三休

黃昏樵米早回歸同伴相邀未有期抱子老妻門口望  
南山有虎悔何追

空門

閉口桐魚勿復論數間老屋枕雲根曉鐘三板出山去  
分付獼猴爲守門

錫杖凌空去復還片雲縹緲伴身閑春風錯種醍醐草

引得牛來食雪山

人居天地一樊籠  
撫掌山家四壁空  
不道今年空得盡  
且無雀鼠到山中

四祖門庭寂寞秋  
牛頭只是舊牛頭  
如何一旦風光別  
花落花開百鳥愁

四卷楞伽几上安  
而今老去懶能看  
庭前桂樹花開未  
分別西風信鼻端

黃金欄護紫架裝  
禁苑恩深賜予奢  
林下衲僧那有此

多年枯木對春華

結草爲廬萬仞頭  
人間蟻穴自王侯  
客來借問窮通理  
不意僧中有許由

白蓮有社一經過  
會意由來不在多  
滿目廬山青未了  
聞鐘歸去意云何

我本三生兜率天  
爲差一念又塵緣  
早知密意無多子  
不着旁行貝葉邊

燈燈相續古猶今  
怪底門前立雪深  
衣不得傳關臂事

汝師輕發老婆心

山居

春到寒芳總向榮  
藥苗旋種亦初成  
山翁幸自無誰識  
可要山中宰相名

空山薇蕨供清齋  
世事悠悠不掛懷  
梅溽得風醒午枕  
竹陰轉日上南堦

白雲縹緲野人家  
丹事年來漸有涯  
不與世人爭月歲  
却將椿菌勘南華

宿雨初乾一杖藜欲呼漁艇訪前溪碧桃花落無尋處  
惆悵人間日又西

半屋雲霞與鹿分兩株古木正當門野花自落東流水  
坐對青山酒一樽

好山當戶四無隣似是秦時採藥人千百年間天地裏  
不多不少一閑身

宿世仙家十二樓誤嬰時網未深愁浮丘輩行如相覓  
騎却紫雲歸去休

種藥千畦手自鋤年來漸喜識人疎等閑旋點黃金賣  
莫訝家無擔石儲

矮牕歌枕看朝榮老覺迎逢禮數生來往頗知麋鹿性  
寒暄不會俗人情

擁樹溪雲迷近遠低簷山果亂紅青莫言身外都無事  
早晚焚香看道經

漁父

不踏長安十二門鷓鴣飛處數家村停橈試向灘頭問

莫是嚴光末世孫

一曲清漪濯晚霞釣竿斜插白鷗沙  
傍人借問居何處  
四海五湖都是家

秋風浙浙獵菰蒲如此江山其可孤  
天與玻瓈三萬頃  
更添一半夕陽鋪

長作絲綸短短牽一池漢水盡南天  
誰知有客量江面  
不是漁郎兩板船

推起篷牕抱月眠  
三三兩兩柳邊船  
不須聽說文王事

孤負漁竿八十年

傳呼扶柁晚風前一陣驚鴻沒遠煙不是吾儂棲泊處  
却回別港避官船

五湖煙裏我知魚屬玉春鋤一處居欲到垂虹風作惡  
幾株官柳向人踈

秋聲只在樹中間極浦斜陽更有山卷却絲綸呼酒盞  
鷗邊聊得此身閑

舟繫蓬萊淺水傍鰲頭縮盡海生桑百川日夜滔滔去

借問人間有底忙

壁月滄波上下天  
秋風搖落四無邊  
玉龍盡喚眠鷗起  
兩岸蘆花不見船



江湖小集卷三十一

欽定四庫全書

集部

江湖小集卷三十二至五

詳校官中書臣張姚成

助教臣常循覆勘

覆校官主事臣龔敬身

校對官助教臣胡子襄

謄錄舉人臣李椿

謄錄監生臣張曾誼

欽定四庫全書

江湖小集卷三十二

宋 陳起 編

朱繼芳靜佳乙稿

庚戌壽意一先生

江涵秋色碧潭潭  
飲馬胡兒不敢南  
宥密老臣功第一  
緝熙天子歲登三  
身扶紫極星辰正  
手折黃封雨露甘  
見說年來淮尾漲  
漢庭可要百曹參

反招隱

木末徑微微誰敲白板扉緩行松葉滑小摘藥苗稀山  
色自今古塵寰多是非昂昂千歲鶴便肯傍人飛

太極圖

動靜無端畫一圓分明擘破又渾全日光漏得先天意  
鑽入書窓箇箇圓

觀化

看見青蟲作蝶時不知蝶是此身非牀頭爲有南華卷  
午枕酣來忽夢飛

蝨

一蝨何唧唧吟落兒童心只在竹籬外篝燈無處尋

春晚有感

坐對吳山酒閑同越客吟月明人渡淺花暗鳥啼深往  
事空流水還丹未化金不堪春又晚惆悵百年心

送僧蘋洲遊樵李

師今遊樵李自刺釣船篙地說三吳勝人夸二陸豪草  
黃工女績波白課丁熬近海寒應早霜毛怯剃刀

有歎

與老本無期相尋天一涯履承雙足繭帽裹半頭絲路  
近行猶歇鄉逢夢豈知酒酣增意氣忽憶少年時

子規

自身歸未得却勸別人歸思婦心中事征夫淚滿衣蜀  
天知近遠江樹間稠稀幸自安雙翼誰教不奮飛

老將

不把瑯刀賣曾隨夜斫營老年猶善飲壯日想能兵上

馬身仍健看鴻眼更明戰多人不信枉指箭瘢呈

登眺

破帽任風吹天知髮已絲大江流禹蹟老樹見秦時北  
際山如礪南溟水似池夜涼無夢到久矣歎吾衰

梨山廟

無處着詩名梨山萬古青人間留此像天上作何星祝  
史祠神醉騷人謁夢醒當時青紫檀曾有許精靈

惜花

留春春不住春去落花隨枉自收殘片何堪綴舊枝輪  
蹄前日約蜂蝶一年期代謝由來事誰能作許悲

桃源官罷芸居以唐詩拙作贈別

自作還相送唐詩結伴來歸裝携此重笑口爲君開蓮  
上巢難穩桃邊艇却回空餘吟卷在沙鳥莫驚猜

元日

堂上序周親相看又一春吾年方覺老童子儼成人婪  
尾屠酥酒從頭鬱壘神何須千歲上即此是新陳

昭慶寺

幽尋得勝趣城市幾人能古柳深中磬長廊盡處燈畫  
龍聽說法塑佛看齋僧別寺經行遍茲遊昔未曾

茗溪

維舟古祠下野飯就魚羹坐聽篙人說行逢牽路平居  
民難問姓溪鴨自呼名天目無由到沿洄更幾程

雪中僧虛舟來

雪中聞犬吠清卧起來遲開戶千山白逢僧一箇緇言

從風絮裏憶得雨花時  
寒舍無祇待煎茶且說詩

湖蕩

雙橈入天影野葑綠全交  
魚唼垂絲柳鷗眠折葉菱  
人行沿岸曲落日掛林梢  
歸去嚴城隔僧門尚可敲

六和塔

三百有餘年潮頭不敢顛  
孤尖標白浪層級上青天  
鈴隔山僧唄燈通海客船  
老來登眺眼不道步難前

題丘芳仲月林

阿姊種婆婆，婆秋風柰若何。人間千樹少，天上一枝多。安得仙槎客，携將玉斧柯。和根都斫却，還我舊山河。

贈日者

烏兔走雙丸，誰將手控搏。短長三萬日，好醜百千般。數遠談何易，天高問却難。送君尋富貴，我命不中看。

旅館

僕行方請息，旅館復相招。小市三家聚，前邨五里遙。茅柴侵熟飲，松葉帶生燒。猶有斜陽在，行吟忽斷橋。

嚴衢道中

草白三了路苔青五里牌  
長年車馬客幾兩利名鞋  
斗糴隨時賣方言到處乖  
近山樵有主童稚拾松釵

舟到梅雨暴漲

夜月離於畢篙師可奈何  
帆穿風減半江濶雨添多  
側岸無牽路中流有旋渦  
平生柁樓底得在柳梢過

對酒

莫信樵人說秦時有樹存  
青天浮渤海白日走昆侖  
爲

有愁千斛時須酒一樽  
醒壺亦相勸花下綠陰繁

客路

閨閣空相憶那知客路艱  
背人前去鳥迎面遠來山夜  
泊孤燈悄晨裝片月彎  
猿聲不知處杳杳白雲間

送人之武昌

秋風吹落葉君作武昌遊  
只道從軍樂那知別路愁  
寒暄楚岫色日夜漢江流  
大閩多珠履無爲彈蒯緜

舊遊

兩峰多少寺分日去遨遊山翠橫天目湖光浴佛頭花  
朝騎馬醉月夜傍船謳一被微官縛重來不自由

挽芸居

不得書來久那知是古人近吟丞相喜往事諫官嗔身  
死留名在堂空着影新平生聞笛感為此一沾巾

溪寺

背人沙鳥一行斜喚客桐魚幾疊槓誤向山中叅白足  
不知頭上着烏紗煮茶烟暖浮新竹洗鉢泉香帶落花

過夏功勞眠與食誰能展卷看楞伽

暮春

姚黃魏紫惱人看  
羅襪成塵俛仰間  
蜀魄聲乾花有血  
相靈淚盡竹無斑  
年光冉冉趨雙鬢  
暮雨霏霏失四山  
老裏情懷天地窄  
莫教一日酒杯閑

少年

紫陌尋芳愛馬遲  
一春能得幾晴時  
海棠露重衣全透  
楊柳風微帽半欹  
大白引浮銀鑿落  
小紅吹徹玉參差

人生行樂須年少莫等星星滿鏡絲

江湖偉觀

吳山表裏水為池百有餘年壯帝畿天目舊將雙鳳下  
海門新拱六龍飛胥濤白雪生秋思太乙紅雲駐夕暉  
江上沙鷗湖上舫柳絲風裏兩依依

用前韻謝野水郎君招飲

爲有臺池無限嬌遊人歌舞尚朝朝清漪浴日開金面  
晴哢調風袞綠腰騷客五花唐殿馬主家七葉漢庭貂

丁寧紅紫休開遍約住春風待見遯

次韻橋亭禊事

圮上還成集禊亭杉松自古草仍新彩虹卧飲流杯水  
白鷺飛迎入座賓俛仰已成今昔事東西更看往來人  
聚蚊金谷皆安在若見吾徒合主臣

次庸齋先生韻贈黃隆中

醒眼隆中閱逝川茅茨爲屋竹爲椽吟成梁父時當隱  
炊熟邯鄲客正眠漢土一杯無處覓白墳三尺有人憐

君歸欲作千年計只合躬耕一寸田

聽白雲寺清師琴

古寺沉沉晝日長冷然清響發僧房  
昭君別去顏如玉蘇武歸來鬢已霜  
山水無端言爾志炭冰何事置吾腸  
老來却愛虛簷外雨滴梧桐一味涼

送李敬則之昇揚

江北江南一葉舟憑將往事問東流  
錦帆月冷瓊花夜綺閣風高玉樹秋  
杜牧三生開笑口劉郎五絕掉吟頭

淮山眼見詩人慣，高築詩壇汗漫遊。

次韻池上暮雨

濕遍欄干欲倚休，手中團扇漸知秋。  
細聲合作簷間溜，大點漂成水面漚。  
小小竹窓醒倦鶴，踈踈荷屋冷棲鷗。  
漁翁蓑笠隨身在，立到黃昏釣未收。

書窓夏日

南風伊軋語窓扉，團扇無功白日遲。  
長恨老來方學易，自從春去不吟詩。  
蟲絲有力縈琴索，蛙粉無聲點墨池。

偶出門前行數步石榴花過已多時

贈西蜀馮道士

峨眉山月照清溪中有方瞳一羽衣  
柱杖經行天下半  
丹砂乞與世人希  
千年城郭空歸鶴  
萬里山河自落暉  
安得與君遊汗漫  
乘槎一問女星機

次韻李黃州江淮偉觀

檻前卷箔見晴峰  
夏口武昌西復東  
三國六朝襟帶地  
孤城四水鼓鼙中  
女牆夜送淮山月  
老樹秋生夢澤風

君作此堂闕  
萬里應憐世上少英雄

示醫卜逢松崖

我生八月十五夜清淺斜河浸月華  
顧兔擣殘千歲藥  
牽牛引動半天槎  
自拋蓬海傳方處  
曾過成都賣卜家  
今日相逢圓昨夢  
一杯松下醉流霞

陳令君增誠齋三三徑爲十二徑次韻

四家三徑各風流  
今古悠悠貉一丘  
拍甕新篇浮臘膩  
繞堤老柳弄春柔  
日邊黃紙催人去  
霞外青山聽鶴留

若問西疇蓑笠事合還陶令一孤舟

次韻野水花朝之集

睡起名園百舌嬌一年春事說今朝  
鞦韆庭院紅三徑  
擘盃池塘綠半腰  
苔色染青吟屐蠟  
花風吹暖弊裘貂  
主人自欠西湖債  
管領風光是客邀

和秋房題半湖樓二首

天目飛來第幾峯  
峯前着屋貯虛空  
濕雲低亞鈎欄角  
缺月斜窺戶牖中  
一水東西添柳岸  
兩山南北欠樵風

住家欲作千年計頃刻陰晴便不同

四明仙客此樓居畢竟西湖壓鑑湖曾謂家童欺賀老  
不如沙鶴認林逋蒲根釣水知深淺柳外行人乍有無  
此景天公厭多取只分一半與吾徒

栽松道者像

手便筇杖冷脚厭芒鞋緊兩袖吹松風東岡復西嶺

吳歌

鴈影江潭底秋聲浦溆間吳兒歌一曲月子幾回彎

草蟲便面

蝶舞蜂歌倦蜻蜒看未休誰知織婦意方夏已思秋

意行橋

我行且美適興盡忽自返倒影射清漪回光在橋板

塵外

塵飛不到處山色入芒屨乘興一長吟回頭已忘句

鴻

鴻飛九天人在平地望塵土與青雲其間能幾丈

聽雪

瓦溝初瑟瑟，隱几坐虛白。良久却無聲，門前深幾尺。

東菑

東菑足時雨，離離半青黃。田家不待穫，小摘炊新香。

畫舫

畫舫茭中出，青山樹上斜。浪醒孤客酒，塵蓋萬人家。

溪村

六言

檣柳正當官道，漁舟偏繫柴門。今年春水深淺，看取層

層岸痕

雨洗山光綠  
淨波涵天影  
清空草際自  
浮鵝鴨柳陰分  
坐兒童

漁翁

漁翁家在何許  
慣宿蘆花不歸  
昨夜江村欲雪  
百錢買得蓑衣

揚州

金陵王氣水  
東流流到東  
淮古岸頭  
夜半一聲天  
上曲

錦帆天子下揚州

七夕

兒女穿針夜向分  
樓頭月落尚爐熏  
憑誰爲覓機邊石  
留取支牀卧白雲

野望

帝青八萬四千里  
更着脩眉一兩尖  
古往今來愁得盡  
不教我輩送愁添

題李秋堂盟鷗集

相逢已恨十年遲  
買酒吳山一夜詩  
明日送春仍送客  
柳花風颺鬢絲絲

航海

地角與天倪  
茫茫何處期  
星回析木次日挂  
扶桑枝沉石尋孤嶼  
浮針辨四維  
飄然一桴意  
持此欲安之

橋西

雲澹風微日未低  
瘦藤扶到小橋西  
林花過雨相爭發  
谷鳥無人自在啼

淮客

長淮萬里秋風客，獨上高樓望秋色。  
說與南人未必聽，神州只在闌干北。

調宜州冷官不赴

瘴海南邊路淺深，客愁不待嶺猿吟。  
無人喚得涪翁起，分我桄榔橄欖陰。

辛亥二月望祭齋宮因游甘園

山入湖光碧四圍，棋枰零落葑田稀。  
蒲芽短短鴛鴦冷。

惟有漁師幾網歸

朝霏作雨連天濕  
春氣熏人到骨香  
四望水亭無正面  
有花多處背湖光

海棠陰下小徘徊  
屐齒深深一徑苔  
忽聽銅鈺花外近  
園丁說是主人來

老眼看花興未厭  
不知頭上雨廉纖  
流鶯浪語春風恨  
誰拗花枝插帽簷

公事相妨一半春  
今朝纔得自由身  
眼中領畧能多少

細雨斜風便妬人

晚眺

鳥飛欲盡暮烟橫一笛西風萬里晴  
山外有山青不見  
微雲映出却分明

次意一先生仙霞壁間韻

回首仙源隔彩霞  
叢祠攬內有飢鴉  
貞元朝士重來晚  
不見桃花見菜花

宜春臺

是長沙定王子築

定王米換長安土北望長安日幾迴更有築臺歸未得  
憑高却望定王臺

行路難贈蕭坦翁

行路難居不易旋買生柴煮一字三千風月不直一杯  
水何用狂吟動天地君不見陸天隨忍窮讀書白眼屠  
沽兒又不見孟東野載少於車車是借丈夫吐氣摩星  
斗六印黃金真唾手莫吟詩詩能窮人君不知古人坐  
詩窮到骨今人方笑古人癡又聞夜半舟移壑却嘆東

門黃夫華亭鶴人生短長無百年富貴未必如賤貧富  
貴賤貧何足據出門揔是亡羊路居不易行又難況是  
長安十二門相逢一笑豈易得莫惜床頭沽酒錢

送李秋堂赴京口酒人

客懷正賴春相與苦欲留春天不許送君一舸下南徐  
落花起舞流鶯語鮫人浴出扶桑繭天女染作紅雲段  
君從何處得錦機借與人間爲樣看青杏園深暖漏長  
柳綿如雪撲酒缸吳姬道字未端正當壚學唱新番腔

貌貅百萬張頤仰都將鐵甕盛春釀有客高談四座傾  
主人合序諸侯上日邊此別各南北君頤始髭我衰白  
何以贈之折柳條千絲萬絲心搖搖

讀黃玉溪湯婆婆傳

君不見湯家阿泉驪山陰出入宮掖承恩深只流妃子  
脂粉氣不暖少陵如鐵衾又不見湯家阿池紫塞上沉  
香霧擁將軍帳天寒十指墮弓刀底用空言如挾纊何  
如韓時老湯婆冬則飲湯惟腹皤形模混沌婦女笑閉

塞其兌藏天和老生門前十日雪兩脚凍皴眠不得斷  
無蠻素構心兵賴有婆兮相暖熱夫人竹氏青玲瓏炎  
炎幾時柰秋風婆耻居下常熱中毋棄憔悴以御冬得  
黃太史五字詩厥孫傳之尤滑稽霜風蕭蕭歲年晚吾  
喜湯婆有完傳

挽周伯弼

今日忽不樂散行湖水濱有懷天下士遽作夢中人醉  
語驚天地狂歌哭鬼神九原如可贖那不百其身

贈續芸

誰謂芸居死餘香解返魂六丁將不去孤子續猶存科  
斗三生債蟬魚再世寬向來詩作崇揮涕對人言

滄浪風月

我登滄浪亭復歌滄浪曲歌竟復長歌杳杳山水綠天  
風吹散髮山月照濯足爲謝獨醒人漁家酒初熟

有懷鷺山次僧芳庭韻

一塔與雲齊尋僧路不迷小舟沙鳥外踈磬夕陽西古

樹含雲亞春橋覆水低  
鷺峰飛不去夜子規啼

柳

臨水送將歸春風折贈時  
而今三丈樹元是手中枝

鷗

採魚秋江上鷗鳥來相隨  
蕩槳忽驚起雲天碧四垂

天竺分韻得芳字

縹緲白雲鄉天風吹曉涼  
人尋水源至路入樹陰長  
晝靜聞晴哢春餘拾澗芳  
余心忽有得欲語又還忘

江湖小集卷三十二

欽定四庫全書

江湖小集卷三十三

宋 陳起 編

林尚仁端隱吟稿

七閩山川奇秀行建劍以南溪流益駛傑峯峻崖挺  
挺峭立渟涵鍾結發爲人物皆瓌偉俊明抱負之美  
至不減中州故擔簦負笈來試於京者常半天下家  
有庠序之教人被詩書之澤而仕於朝爲天子侍從  
親近之臣出牧大藩持節居方面者亦常半而今世

之言衣冠文物之盛必稱七閩吾福又七閩之盛也  
古爲長樂郡縣因以名有林君尚仁者一日以詩來  
謁讀其詩識其爲人也揖之進使之坐與之上下議  
論皆纒纒可聽知其深乎詩而非苟於作者也因請  
定交越數日林君又出數則以示讀之矍然而喜因  
請見全藁林君曰余平生苦於吟所得亦不少矣然  
微不合我意則裂去惟恐緩今存者無幾何公有命  
其奚敢辭又數日林君携短編以過見之愕然而驚

離席而起執其手謂林君曰子腸腑間豈皆錦繡耶  
不然何其言之多美也嗚呼吾知之矣子生於山川  
奇秀之區而家於文物衣冠最盛之地呼吸其所謂  
瓌偉俊明之氣而來西湖之上漱濯於清冷之濱以  
發其胷中所有者吾聞昔孤山有和靖翁高風退節  
凜凜可尚君豈其耳孫乎蓋嘗登茲山而問乃翁舊  
游今其朝煙暮雲冉冉滿山而昔所謂蒼童白鶴尚  
無恙乎老梅玉立如故不知暗香疎影之句尚可得

而聞乎千百載之下誦其詩如見其人余意翁未嘗  
亡也予行山中久矣清風明月之夕或一遇之翁必  
有以授子矣固宜詩之多美言也嗟夫天下之義理  
無窮而詩爲難工昔余率然而作今退然而悔者多  
矣林君益務勉之使余屢見而屢驚焉則夫所以期  
林君者不止此林君字潤叟自號端隱其爲詩專以  
姚合賈島爲法而精安深潤則過之每來對余言切  
切然惟憂其詩之不行於世而貧賤困苦莫之憂也

觀其志蓋知所尚矣余誠懼乎世之知林君者未能  
衆故樂爲序其詩而表出之後有知林君必自此詩  
始淳祐歲辛亥小至日陳必復書於封禺山中

飲葯房陳戶山居分韻得閣字

常人厭寂寥隱士畏喧雜山居主人百好無終日哦詩  
閉書閣我本山中人心事亦頗合杖藜約客行幽深來  
扣吟扉坐陳榻不叙寒暄說晚唐滿座春風屢傾榼霜  
晴沙路軟如泥谷鳥相呼聲自答花時不飲空白頭世

味由來如嚼蠟  
祇憐無夢化作蝴蝶飛  
遶盡百花深處  
日千匝

暑夜

松風生晚涼  
坐久市聲歇  
客去行獨吟  
踏石碎明月

題蘆鄉思歸圖

不畫梅花却畫蘆  
自言家在箇鄉居  
當時恨不曾添鴈  
爲帶平安一紙書

九日登烏回寄鄭渭濱

烏回山下寺閑抱一琴遊客路黃花晚江城寒露秋持  
書誰送酒懷古獨凭樓想爾西風裏送籬吟未休

和陳葯房納涼

貪涼分石坐野服岸巾紗竹暗鳴風葉溪暄聚水花深  
村人語靜高樹鳥飛斜不飲論文酒敲碁煮夜茶

贈歌者

聲逐嬌雲學鳳鳴王孫幾醉拍欄聽春深莫唱關情曲  
多少行人過柳亭

新昌道中

春紅落盡雨霏霏爲怯輕寒尚夾衣  
村路每於泥處滑鄉音漸與市人非  
護蠶谿女條桑去抱布山翁換米歸  
世味徧嘗只如此幾番清夢落漁磯

寓華亭下砂鹽場

地僻民居少官勤國課優  
遠程驅瘦馬小港礙行舟  
晴日鹽花曉風潮海氣秋  
野人因買鶴半月此遲留

秋日書懷

十年客路歎飄蓬，歷盡風霜鬢欲空。  
睡少半疑茶作祟，愁多全覺酒無功。  
數蛩厭靜鳴秋雨，一葉驚寒落晚風。  
惆悵故園歸未得，草荒籬下菊花叢。

遣越留別

江亭飲罷起離愁，何事西風又越遊。  
潮信欲來人欲去，夕陽紅蓼滿汀洲。

此山林僉葯房陳戶偕張牧隱暮春晦日載酒  
相過席上以手揮素絃爲韻得絃字

春詩敲未穩一醉傍琴眠吟客相過日飛花欲盡天竹  
陰池水暗樹色島雲連幽鳥可人意數聲清似絃

寒夜即事

吟苦過於顛吟成亦自憐凍油燈影薄深屋語聲圓分  
月照歸客避寒移卧氈一冬少閑日不得到梅邊

春日偶成

未逢知已愧蹉跎又見春風長徑莎杜宇一聲詩思減  
楊花三月客愁多從人乞米貧如舊借吏抄書字半訛

懶說江湖十年事  
近來平地亦風波

廢寺

勅額雖存屋半傾  
爐香無主佛無靈  
豪家不管空門事  
日夜西風語塔鈴

自賦

學書學劍兩無成  
天乞梅邊隱姓名  
未必清閑非盛福  
縱教富貴亦虛榮  
百年有限春風老  
萬事無心夜月明  
何計莫餐煙火供  
漱流眠石過今生

送林雲岫歸省

西風吹客衣，束擔出王畿。  
千里莫嫌遠，幾人猶未歸。  
山空秋鶴瘦，天闊暮雲飛。  
料得還家日，將詩壽綵闈。

雨中和張西麓

雨聲聽易厭，况復事關心。  
終夜不成寐，一春徒費吟。  
委紅花命薄，重碧酒盃深。  
何日西湖上，移船繫柳陰。

連雨留宿陳葯房吟所

谿水分流急，谿雲帶濕飛。  
防飢童乞米，畏冷客添衣。  
雨

院碁聲潤風窻燭影微  
終須待晴去踏月夜深歸

偶題

矮屋過如斗樣寬  
閉門渾不受春寒  
海棠睡去梨花瘦  
次第東風到牡丹

弔友人墓

樹陰雲影暗空山  
銘石雖存不忍看  
燒罷紙錢灰未冷  
落花啼鳩雨聲寒

遊陽明洞天

每箇虛亭坐片時旋尋古蹟上巖梯石含秋色苔痕老  
洞接雲天樹影低樵客出林驚虎嘯道人臨水聽猿啼  
吟邊欲記陽明事恐動山靈不敢題

清真觀

一宮占斷水中央瘦竹添丁護短牆老鶴聲中松子落  
遊魚影裏藕花香雲房不雨琴常潤池閣無風榻自涼  
擬辨隱心終老此便須歸與鶴商量

春晚

春事又無幾陰晴苦不齊久貧交味薄多病語聲低落  
絮行風徑歸雲度晚谿故鄉二千里日夜子規啼

贈褚雪巖

多年林下隱猶帶舊儒酸自說因詩苦還如學易難曉  
窻花氣潤夜枕雨聲寒又欲名山去應尋勝跡看

村居即事

外事少曾聞深居似隱君谿明花照影風細水行文蠶  
室寒初閉蜂房早已分偶因尋藥去踏破一村雲

寓舍留別

撥盡寒灰雨後深  
半窓燈影伴孤吟  
不眠只有琴知得  
明日陽關何處心

課伐木

手揮樵斧氣如虹  
幾樹寒煙一餉空  
午夜無依烏鵲冷  
數聲應恨月明中

懷潘寒岳

別後空相憶  
無書直至今  
頻年千里客  
多事半生心  
卯

酒欺人醉春詩帶病吟倚欄政無緒一鳥過花陰

余種竹方成扁其室曰竹所友人以詩至用其

韻

屋老苔荒席久虛近分一榻與雲俱梅花未種招蜂怨  
竹所雖清欠鶴圖無事看山如對客有時隱几亦忘吾  
過門除却能吟者不是高僧即老儒

山居

帝城花錦地讓與市人居萬事不到耳一貧唯讀書掃

金史四  
卷三十三  
牀留月宿種藥帶雲鋤未晚多先醉爲官恐不如

簡許有實

閑磨霜刃破銀瓜沉水香銷日影斜吟客不來情思懶  
晚風庭院落槐花

陳葯房聞人馬谿黃平嶺春日相過分得琴字  
半生無厚業祇合住山林留客旋沽酒典衣因買琴晴  
憲行野馬高樹語春禽彼此知心久相看意轉深

過友人幽居

門似野人家空園擬種瓜有僧分石坐無酒問鄰賒獨  
鶴喜欲舞老梅寒自花此身歸未去猶愧暮林鷗

旅懷

欲暮西風引客愁十年如夢住他州故交零落誰知已  
往事淒涼欲白頭一紙音書燈下淚滿城砧杵月明秋  
早知世路風波險只在中煮石休

懷蒲一庵許紛虫

新營一榻養天和獨喜身閑鬢未皤藥性不諳緣病少

花名慣識爲吟多移書曬日防留蠹寫帖臨池擬換鵝  
不到玉峯今兩載故人情味近如何

陳葯房舟中分得詩字

移舟春岸曉小雨欲晴時烟樹望疑暗水程行較遲推  
蓬山色近得句野鷗知來往無多路歸囊又一詩

寄表兄鄭古潭

江湖風浪惡飄泊此依依白髮親俱老深春人未歸雲  
留行李住風遣落花飛強飲盃中物芳心莫易違

閑裏

閒裏身心得自如  
春風茅屋燕同居  
松花滿地谿雲滑  
一榻晴窓卧看書

寄西湖友人

湖邊春更好  
別後費吟思  
載酒曾遊處  
憶君同醉時  
面風花落易  
背日雪消遲  
早晚携琴去  
山中與鶴期

送友人別

此心偶無事  
君復叙離情  
江國多寒色  
春風幾日程  
雪

添行李重船逐浪花輕後夜應相憶空山月正明

送楊巨川遊邊

此行不必語離愁且舉匏樽醉幾籌天下豈無山可買  
男兒當與國分憂劔辭星匣邊風凜船駕雲帆海月流  
莫道讀書無用處讀書方有用兵謀

寄鄉友

此身拘不得暮楚又朝吳故國幾人在三年一字無天  
風潮信急江月鴈聲孤久不看清鏡年來有白鬚

寄吳宗之

在家猶苦熱客路足應疲書劒果何地江湖非舊時久  
晴苗欲雨多病藥如飴憶自分携後知心更有誰

雪中呈社友

風雨蕭蕭攪雪飛一寒如此只貪詩酒瓢傾盡囊金少  
恐被梅花笑不知

送陸月湖歸玉峯

行李無多半是詩買船兼載鶴同歸思君晚泊吳江冷

風捲蘆花幾鴈飛

喜友人爲僧

身披雲衲瘦伶俜  
一刺新添得寺名  
餐供未便跣足坐  
誦經猶作讀書聲  
禪窓欲晚聞鐘掩  
吟履逢秋踏葉行  
應是千生修得到  
幾人頭白尚無成

贈許紉岳

年齒未三十清名已照人  
才高猶苦學俸薄不言貧  
留客醉終日愛花吟過春  
自憐閑未得滿面撲京塵

辛亥元日遊聞人省庵園和陳葯房韻

倚欄吟未穩把酒問溪山今日又添歲一冬無此閑梅  
花依竹靜雪意避春慳次第燈期近重逢一解顏

賀陳石泉宰華亭歸

天下稱繁邑一廉如此希政成人惜去官滿鶴先歸家  
學傳金管春風入紫薇知音正當路健翼看高飛

夜坐

焚香獨坐勘騷經庭樹無風葉不鳴靜入夜深聞鼓吹

一池明月亂蛙聲

梅雨

繁聲不可聽  
點滴似秋霖  
谿長欲無岸  
窻低微復陰  
葛衣涼意重  
礎石潤痕深  
欲出愁泥濘  
依依獨客心

訪隱者

姓名多已在仙行  
見說曾傳辟穀方  
未必詔書徵便起  
可憐人世老猶忙  
浴蒲礪冷雲初濕  
種朮山春土亦香  
何日此身分半隱  
歸須先製芰荷裳

戲友人買侍兒歸

幾扣吟窻多不遇識君雖久會君稀近聞行李擔書去  
添得明珠伴劍歸開甕酒香春遠屋倚欄人醉月侵衣  
野夫別有觀心法不在深山獨掩扉

鶴

楚楚異凡禽相看瘦不禁飢尋芝未晚夢憶海山深華  
表千年事青天萬里心一聲唳清夜霜月滿疎林

江湖小集卷三十三

欽定四庫全書

江湖小集卷三十四

宋 陳起 編

陳必復山居存稿

余愛晚唐諸子其詩清深閑雅如幽人野士冲澹自賞要皆自成一家及讀少陵先生集然後知晚唐諸子之詩盡在是矣所謂詩之集大成者也不佞三熏三沐敬以先生爲法雖夫子之道不可階而升然鑽堅仰高不敢不由是乎勉姑哀存作筆之是編將以

求印於運詞林之斤者非曰自眩云爾是爲山居存  
藁闕人陳必復无咎書於葯房吟所

山居

接砌斜通徑緣籬矮結牆地卑蝸篆壁山暖蜜分房過  
雨林亭靜落花春晝長幽居差省事猶有課詩忙

領客游聞人氏省庵園

半夜雨方住一春晴不常倚欄聽鳥語開戶納花香庭  
暮竹陰淨池風水氣涼幾番吟未穩步月細平章

構得

構得數簷椽  
閒身與靜便  
半簾花影碎  
一樹鳥聲圓  
吟苦瘦於舊  
春寒多似前  
閉門無客過  
心事付琴邊

百五節

獨遊苦無侶  
偶步到前川  
春水綠於染  
山花紅欲然  
冷煙寒食月  
小雨浴蠶天  
此去嬉游少  
風光又一年

贈林尚仁自號端隱

谿邊著吟屋  
亦足老生涯  
洗硯渾池水  
敲棋落案花  
客

來多載酒童去自煎茶愛爾丰標異逢人滿口誇

舟中得催字

出郭少晴日春陰欲釀梅岸痕新雨過島色曉雲開數  
鳥煙中落一帆天外來谿行正如畫頻報長年催

客枕

客枕偏饒睡春歸尚擁綿屋深燈易暈漏短夢難圓棲  
鳥警涼夜闌蛙喧雨天一聲桑櫓過何處上谿船

歸自德清

午陰雲弄日水漲浪侵磯小巷漁舟聚深村酒戶稀  
牛閑童自睡蠶熟客方歸隔岸人家近繅聲出翠微

游前谿西庵

為愛僧居雅時來扣野扉沼清魚可數軒靜客忘歸  
脩竹負牆立幽禽背水飛道人差不俗洗耳聽絃徽

贈張駒自號牧隱

乍見語相合苦吟心更親老於琴得趣隱與牧為隣  
一夜簷花雨十年江樹春所交半湖海恨晚識斯人

東野故居

先生高隱地遺跡尚堪尋  
出郭祇疑近入村還覺深秋  
光淡平野暝色帶遙岑  
幾度祠邊過詩成不敢吟

響應寺

步屨窮幽討扶筇上碧尖  
山高秋易瘦瀑小雨方添  
寺老僧單少潭深廟祀嚴  
平生丘壑志愛此結茆檐

宿龍山精舍

偶貪禪宇靜襆被到深林  
夜榻僧同話寒簷客自吟  
窓

明疑積雪樹黑怪常陰猶恨匆匆出丁寧約重尋

僧房

結廬脩竹裏身外世緣輕滑几淨如拭小窓低更明夜  
深留佛火人靜聽鐘聲共撥爐火坐跏趺對短檠

山中書事

天氣如春盜連朝未有霜數蟬嘶老木一鳥渡寒塘風  
竹寫晴影水花臨曉妝靜中觀物化此意等羲皇

曉步

清曉步幽逕庭蕪帶綠莎籬根惟有菊池面已無荷高  
樹蟬聲急遠山寒色多小窓風日轉便覺似春和

吳江道中

葉老蠶登箔泥肥燕葺巢曉風帆腹飽夜雨柁梢高久  
客交游少一春行役勞短篷終日坐煮茗讀離騷

和客用韻

麥風翻蝶夢花露濕蜂巢水濶浪痕帖雨晴雲氣高酒  
功書下下詩料辦勞勞擬喚三高起豪吟此楚騷

舟行崇德

落日掛征帆西風客袂單  
燈明村店近船重水程寬  
蘆蓼作秋意汀洲生晚寒  
鐘聲煙外寺山色夢中看

嘉禾境上

聯疇岡勢斷缺岸浪痕垂  
野店茆柴酒人家槿樹籬  
逆風魚上少連雨稻開遲  
客路秋偏好歸程盡是詩

寄石泉雲間明府叔

容易成離索臨分重忍言  
夜船楊柳岸曉枕荻花村  
山

雨斷雲脚谿風生浪痕懸知自公退懷抱欠同論  
異政人能說新吟客為傳一官清似水萬事信於天養  
鶴分厨料收書出俸錢畫庭少公事閑閣抱琴眠  
卧念相從樂杜門岑寂中曙窓報晴色寒葉語秋風別  
去詩難穩愁來酒易空相看才數驛好為寄書筒

席上和林端隱韻

雲壓簷花重谿禽濕不飛烟林生暝色雨砌上苔衣暮  
鼓深村急踈鐘遠自微吟憲得新句寫向錦囊歸

梅花

瘦得水肌骨亦清詩人於爾獨關情孤高不愛塵埃泥  
潔白猶嫌縞練輕天下有花皆北面歲寒惟雪可同盟  
當時只欠靈均識不與離騷寫姓名

防風氏廟

一去歸期不復聞故鄉目斷會稽雲烏江空墜將軍淚  
蜀國會招望帝魂兩壁衣冠存古貌十年城郭說邦君  
遺民尚指專車骨老樹槎牙枕廟門

偶成

透屋栽梅亦可人，最憐夏月綠陰清。  
前村雨過山如洗，深徑風來竹自鳴。  
滌硯不嫌池水冷，寫書愛傍午窓明。  
近吟未許人知得，且向梅邊隱姓名。

舟中效東坡用韻

底事京塵踏軟紅，又隨征棹過吳淞。  
人家半在桑柘住，春水忽迷蘆葦叢。  
赤蟹白魚今稍稍，紅櫻紫笋已匆匆。  
船窓盡日看山色，多少好山供眼中。



江湖小集卷三十四